

蔡中郎集

冊六

蘇中譯集

卷六

蔡中郎外集卷第四

獨斷

漢天子正號曰皇帝自稱曰朕臣民稱之曰陛下
其言曰制詔史官記事曰上車馬衣服器械百物
曰乘輿所在曰行在所所居曰禁中後曰省中印
曰璽所至曰幸所進曰御其命令一曰策書二曰
制書三曰詔書四曰戒書

皇帝皇王后帝皆君也上古天子庖犧氏神農氏
稱皇堯舜稱帝夏殷周稱王秦承周末爲漢驅除
自以德兼三皇功包五帝故并以爲號漢高祖受

命功德宜之因而不改也

王者至尊四號之別名

王畿內之所稱王有天下故稱王

天王諸夏之所稱天下之所歸往故稱天王

天子夷狄之所稱父天母地故稱天子

天家百官小吏之所稱天子無外以天下爲家故

稱天家

天子正號之別名

皇帝至尊之稱皇者煌也盛德煌煌無所不照帝者諦也能行天道事天審諦故稱皇帝

朕我也古者尊卑共之貴賤不嫌則可同號之義也堯曰朕在位七十載皋陶與帝舜言曰朕言惠可底行屈原曰朕皇考此其義也至秦天子獨以爲稱漢因而不改也

陛下者陛階也所由升堂也天子必有近臣執兵陳于陛側以戒不虞謂之陛下者羣臣與天子言不敢指斥天子故呼在陛下者而告之因卑達尊之意也上書亦如之及羣臣士庶相與言曰殿下閣下執事之屬皆此類也

上者尊位所在也太史令司馬遷記事當言帝則

依違但言上不敢渫瀆言尊號尊王之義也

乘輿出于律律曰敢盜乘輿服御物謂天子所服食者也天子至尊不敢渫瀆言之故託之于乘輿乘猶載也輿猶車也天子以天下爲家不以京師宮室爲常處則當乘車輿以行天下故羣臣託乘輿以言之或謂之車駕

天子自謂曰行在所猶言今雖在京師行所至耳巡狩天下所奏事處皆爲宮在京師曰奏長安宮在泰山則曰奏奉高宮唯當時所在或曰朝廷亦依違尊者所都連舉朝廷以言之也親近侍從官

稱曰大家百官小吏稱曰天家

禁中者門戶有禁非侍御者不得入故曰禁中孝元皇后父大司馬陽平侯名禁當時避之故曰省中今宜改後遂無言之者

璽者印也印者信也天子璽以玉螭虎紐古者尊卑共之月令曰固封璽春秋左氏傳曰魯襄公在楚季武子使公冶問璽書追而與之此諸侯大夫印稱璽者也衛宏曰秦以前民皆以金玉爲印龍虎紐唯其所好然則秦以來天子獨以印稱璽又獨以玉羣臣莫敢用也

幸者宜幸也世俗謂幸爲僥倖車駕所至臣民被其德澤以僥倖故曰幸也先帝故事所至見長吏三老官屬親臨軒作樂賜食皁帛越巾刀珮帶民爵有級數或賜田租之半是故謂之幸皆非其所當得而得之王仲任曰君子無幸而有不幸小人有幸而無不幸春秋傳曰民之多幸國之不幸也言民之得所不當得故謂之幸然則人主必慎所幸也御者進也凡衣服加于身飲食入于口妃妾接于寢皆曰御親愛者皆曰幸

策書策者簡也禮曰不滿百丈不書于策其制長

二尺短者半之其次一長一短兩編下埒篆書起年月日稱皇帝曰以命諸侯王三公其諸侯王三公之薨于位者亦以策書誅謚其行而賜之如諸侯之策三公以罪免亦賜策文體如上策而隸書以尺一木兩行唯此爲異者也

制書帝者制度之命也其文曰制詔三公赦令贖令之屬是也刺史太守相劾奏申下上遷書文亦如之其徵爲九卿若遷京師近臣則言官具言姓名其免若得罪無姓凡制書有印使符下遠近皆璽封尚書令印重封唯赦令贖令召三公詣朝堂

受制書司徒印封露布下州郡

詔書者詔誥也有三品其文曰告某官官如故事是爲詔書羣臣有所奏請尙書令奏之下有制曰天子荅之曰可若下某官云云亦曰詔書羣臣有所奏請無尙書令奏制字則答曰已奏如書本官下所當至亦曰詔

戒書戒敕刺史太守及三邊營官被敕文曰有詔敕某官是爲戒敕也世皆名此爲策書失之遠矣凡羣臣上書于天子者有四名一曰章二曰奏三曰表四曰駁議

章者需頭稱稽首上書謝恩陳事詣闕通者也
奏者亦需頭其京師官但言稽首下言稽首以聞
其中有所請若罪法劾案公府送御史臺公卿校
尉送謁者臺也

表者不需頭上言臣某言下言臣某誠惶誠恐頓
首頓首死罪死罪左方下埶曰某官臣某甲上文
多用編兩行文少以五行詣尙書通者也公卿校
尉諸將不言姓大夫以下有同姓官別者言姓章
曰報聞公卿使謁者將大夫以下至吏民尙書左
丞奏聞報可表文報已奏如書凡章表皆啓封其

言密事得阜囊盛

其有疑事公卿百官會議若臺閣有所正處而獨
執異意者曰駁議駁議曰某官某甲議以爲如是
下言臣愚戇議異其非駁議不言議異其合于上
意者文報曰某官某甲議可

漢承秦法羣臣上書皆言昧死言王莽盜位慕古
法去昧死曰稽首光武因而不改朝臣曰稽首頓
首非朝臣曰稽首再拜公卿侍中尙書衣帛而朝
曰朝臣諸營校尉將大夫以下亦爲朝臣

王者臨撫之別名天子曰兆民諸侯曰萬民

今之
令長

諸侯百乘之家曰百姓百乘之家子男之國也

天子所都曰京師京水也地下之衆者莫過于水
地上之衆者莫過于人京大師衆也故曰京師也
京師天子之畿內千里象日月日月躔次千里

天子命令之別名一曰命出君下臣名曰命二曰令奉而行之

名曰三曰政著之竹帛名曰政

天子父事天母事地兄事日姊事月常以春分朝
日于東門之外示有所尊訓人民事君之道也秋
夕朝月于西門之外別陰陽之義也

天子父事三老者適成于天地人也兄事五更者

訓于五品也更者長也更相代至五也能以善道
改更己也又三老老謂久也舊也壽也皆取首妻
男女完具者古者天子親袒割牲執醬而饋三公
設几九卿正履使者安車輓輪送迎而至其家天
子獨拜于屏其明旦三老詣闕謝以其禮過厚故
也又五更或爲叟叟老稱與三老同義也

三代建正之別名夏以十三月爲正十寸爲尺律
中大簇言萬物始簇而生故以爲正也殷以十二
月爲正九寸爲尺律中大呂言陰氣大勝助黃鍾
宣氣而萬物生故以爲正也周以十一月爲正八

寸爲尺律中黃鍾言陽氣踵黃泉而出故以爲正也

三代年歲之別名唐虞曰載載歲也言一歲莫不覆載故曰載也夏曰歲一曰稔也商曰祀周曰年閏月者所以補小月之減日以正歲數故三年一閏五年再閏

天子諸侯后妃夫人之別名天子之妃曰后后之言後也諸侯之妃曰夫人夫之言扶也大夫曰孺人孺之言屬也士曰婦人婦之言服也庶人曰妻妻之言齊也公侯有夫人有世婦有妻有妾皇后

赤綬玉璽貴人綢綬金印綢綬色似綠

天子后立六宮之別名三夫人帝嚳有四妃以象
后妃四星其一明者爲正妃三者爲次妃也九嬪
夏后氏增以三三而九合十二人春秋天子一取
十二夏制也二十七世婦殷人又增三九二十七
合三十九人八十一御女周人上法帝嚳正妃又
九九爲八十一增之合百二十人也天子一取十
二女象十二月三夫人九嬪諸侯一取九女象九
州一妻八妾卿大夫一妻二妾士一妻一妾

王者子女封邑之差帝之女曰公主儀比諸侯帝

之姊妹曰長公主儀比諸侯王異姓婦女以恩澤封者曰君比長公主

天子諸侯宗廟之別名左宗廟東曰左帝牲牢三月在外牢一月在中牢一月在明牢一月謂近明堂也三月一時已足肥矣徙之三月示其潔也右社稷西曰右宗廟社稷皆在庫門之內雉門之外天子三昭三穆與太祖之廟七七廟一壇一墠曰考廟皇考廟顯考廟祖考廟皆月祭之諸侯二昭二穆與太祖之廟五五廟一壇一墠曰考廟王考廟皇考廟皆月祭之